



12 AUG, 2026

NEEAP 2.0 sasar penjimatan utiliti RM85.24b

Berita Harian, Malaysia



NEEAP 2.0 sasar penjimatan utiliti RM85.24b

Dasar Kecekapan Tenaga dan Pelan Tindakan 2026-2035 (NEEAP 2.0) menyasarkan untuk menyampaikan penjimatan utiliti sebanyak RM85.24 bilion, mengurangkan permintaan tenaga negara sebanyak 11.6 peratus dan mencapai penjimatan tenaga kumulatif sebanyak 815,383 terajoule (TJ) menjelang 2035.

Dasar dan pelan tindakan itu juga merangkumi pengelakan pelepasan gas rumah hijau (GHG) sebanyak 26,108 kiloton setara karbon dioksida (CO₂eq).

Menteri Ekonomi, Akmal Nasrullah Mohd Nasir yang merasmikan pelancaran NEEAP 2.0 di Kuala Lumpur, semalam berkata pelan itu berpandukan Akta Kecekapan dan Konservasi Tenaga 2024.

"Akta itu menandakan peralihan penting ke arah memperintensitaskan kecekapan merentasi ekonomi kita. Bersama fasa seterusnya bagi dasar nasional, termasuk pengurusan tenaga terma, ia akan menggalakkan pengguna mengoptimumkan penggunaan, meningkatkan daya saing, dan mengurangkan tekanan ke atas grid," katanya berucap pada Sidang Kemuncak Tenaga Lestari Antarabangsa ke-7.

Beliau berkata, lebih 10 tahun, NEEAP 1.0 telah menghasilkan penjimatan elektrik sebanyak 60,886 gigawatt-jam (GWh), melebihi sasaran asalnya sebanyak 52,233 gi-



Akmal Nasrullah (tengah) pada pelancaran NEEAP 2.0 di Kuala Lumpur, semalam.

(Foto BERNAMA)

gawatt-jam.

"Ini adalah bersamaan dengan anggaran pengurangan gas rumah hijau berjumlah 35.6 juta tan dan penjimatan kira-kira RM16.1 bilion," kata Akmal Nasrullah.

Beliau berpendapat bahawa kecekapan tenaga mesti menjadi amalan perniagaan standard dan alat produktiviti nasional, serta akhirnya menjadi cara hidup.

NEEAP 2.0 menumpukan pada empat teras strategik iaitu pelak-

sanaan pelan kecekapan tenaga, latihan semula dalam kemahiran dan peningkatan kemahiran tenaga kerja untuk penambahbaikan kecekapan tenaga operasi, mekanisme pembiayaan mampan, dan memudahkan inisiatif serta pelaburan kecekapan tenaga sektor swasta.

Inisiatif utama merangkumi penambahbaikan kecekapan tenaga merentasi sektor perindustrian, bangunan, dan domestik melalui

langkah-langkah seperti kemudahan cekap tenaga, audit tenaga, serta pengawalseliaan peralatan dan perkakas baharu.

Pelan berkenaan seiring dengan pelan hala tuju utama di Malaysia iaitu Dasar Tenaga Negara 2022-2040, Pelan Hala Tuju Peralihan Tenaga Negara (NETR), Pelan Induk Perindustrian Baharu 2030 (NIMP 2030), serta Rancangan Malaysia ke-12 (RMK12) dan ke-13 (RMK13).

BERNAMA